

Protocol no. 61
Sezzüda da lündeschdi, 31 mai 2010, 20.00 – 23.00

Preschaints: Jon Carl Rauch; Chasper Alexander Felix, Georg Salomon, Marianne Werro-Lehmann, Jachen Andri Schmidt e Rico Zini (protocol)

Protocol

Il protocol no. 60 da la sezzüda dals 25 mai 2010 vain approvà.

521 021 FABRICA
Not Janett – Garascha – Archas Sura

Il schef da fabrica orientescha cha tenor tuot la documainta ch'id es avantman, inclusiv la stima, resulta ch'ün toc da la parcella da sar Not saja adüna amo illa zona agricula. Uschè cha'l Cussagl cumünal nu das-cha dar per quel intent ün permiss da fabrica.

522 021 FABRICA
Swissroof – Fabricat nouv – Avant Baselgia (dumonda da princip)

Il schef da fabrica preschainta ils plans revis ingio cha'l fabricat vain plazzà per 2.90 meters plü bass. Uschè vain garanti chi nu piglia davent ingüna clerità als büros da la chasa cumünala. Il Cussagl cumünal decida seguaintamaing:

1. Il cumün es pront da conceder ün dret da fabricar plü dastrusch a la chasa cumünala ed ün dret per fabricar sül cunfin dal vial vers süd.
2. La quota d'otezza dal tet maximala es 10 cm suot quella da las fanestras dal plan terrain. La quota exacta ha da gnir registrada d'ün geometer.
3. Tanter la chà cumünala e quella progettada vain realisà ün passagi public per peduns chi collia Chasellas cun Avant Baselgia.

Il Cussagl cumünal spetta üna dumonda da fabrica per la procedura bsögnavla.

523 021 FABRICA
Robert Peter Berry – Divers fabricats - Zuort

Il Cussagl cumünal decida da dar il permiss da fabrica seguaintamaing:

1. Tenor la dumonda e'ls plans acclus al permiss da fabrica.
2. Las indicaziuns da la pulizia da fö e da l'inspectorat da vivondas sun part integrala dal permiss da fabrica.
3. Il permiss da fabrica per la chadafö vain concess provisoric per ün on.
4. Il pavillon po gnir realisà provisoric e sto gnir demontà la fin da la stagiun.
5. Il banc, las tualettas publicas e la cella freida pon gnir realisats definitivmaing.
6. Il Cumün inchascha seguaintas taxas tenor il reglamaint da taxas e sia agiunta:
- taxa da trattamaint fr. 200.--

524 021 FABRICA
Men e Claudia Luppi – Remissa nouva – Saranschasch

Il Cussagl cumünal decida d'inviar la dumonda da fabrica in sen positiv a Cuaira per la procedura da BAB.

526 620.314.02 Mantegnimaint general da vias
Via Muntaditsch – Zuort – Credit fr. 18'400.--

Il capo orientescha sur da la sanaziun previssa da la via Via Muntaditsch – Zuort. Il Cumün da Ramosch ha insembel cul Uffizi da god pregettà quista sanaziun chi cuosta ca. fr. 100'000.--. 45 % vegnan subvenziunats dal Chantun. Il rest (fr. 55'000.--) vegnan surtuts da Ramosch, Sent e dal nouv possessur dal bain Zuort. Il Cussagl cumünal decida, tenor proposta dals capos, da surtour 1/3 dals cuosts restants e dà liber per quai ün import da fr. 18'400.--.

527 020.431.03 Taxas d'administraziun vias champestras
Permiss per las vias champestras

1. Als 7 – 8 avuost 2010 han lö ils examens da chans da levra in nossa regiun. I vain concess, al Club Svizzer da chans da levra, il dret da traffichar süllas vias champestras, però cun vignettas.
2. Dürant l'on 2010 e 2011 han lö sül territori da Sent perscruttaziuns in connex cun lavuors da dissertaziun. Il Cussagl cumünal conceda il dret da traffichar süllas vias champestras, però cun vignettas.

528 101 MASÜRAZIUN E TERMAZIUN
Dumonda per ün barat da terrain

Il passagi pro la lobia da sar Johann Martin Taverna ha üna largezza da 2.84 meters. Tenor discussiun vain levada l'assa (12 cm) e scurzni amo l'ornamaint da la trama. Uschè chi's riva sün üna largezza da la via da minimum 3 meters. Sco cuntraaffar vain dat ad el üna stribletta per ch'el possa parcar seis auto confuorm al uorden da parcar. Il cuosts dal geometer e dal cudesch fundiari van plainamaing a charg dal privat.

529 Diversas schefs

1. Dieta Promoziun da la sandà dal Grischun

La schefa da sanità orientescha sur da la dieta dals 26 mai 2010 a Landquart, organisada da la Promoziun da sandà dal chantun Grischun. Il program d'eira fich interessant.

2. Revisiun da la schirella (Winde)

Il schef da god orientescha chi fetscha dabsögn da far üna revisiun da la schirella chi vain dovrada per transportar laina. In üna da las prossmas sezzüdas gnarà fat la dumonda per ün credit tenor il preventiv da cuosts.

3. Mas-chalch

Il Cussagl cumünal decida in vista chi aintran fich bleras dumondas da fabrica da trametter, per na retardar las dumondas da fabrica, tenor bsögn eir ün Mas-chalch be cun publicaziuns da fabrica.

4. Indemnisaziun perdita da racolta – Pista da skis

Il schef turissem preschainta las indemnisaziuns cha'ls paur han dabun per lur perdita da racolta chaschunats tras la pista da skis. Men Luppi desista sün l'indemnisaziun, perquai cha tenor seis avis es il don chaschunà quist on in ün rom cha ün' indemnisaziun nu füss güstifichada. Tenor il Cussagl cumünal sun las indemnisaziuns in uorden.

530 **Orientaziuns**

1. Serrada da sala da la chasa cumünala

Causa lavuors da mantegnimaint vain la sala cumünala serrada dals 16 – 29 avuost 2010. Da prümavaira culaiva il tet, e quai ha chaschunà dons, uschè chi fa dabsögn d'üna renovaziun dal fuond. Quella vain pajada da la sgüranza.

L'actuar: